

Kaba

S I D O M B A A M E H

OLEH

A. Damhoeri

% %

Pustaka Indonesia-Bukit Tinggi

1989

2319

KONSUMSI BACAAN BAHASA DAERAH UNTUK : ANAK-ANAK .

K A B A

S I D O M B A A M E H.

oleh

A. DAMHOERI

.//.

Untuk:

Penerbit: PUSTAKA INDONESIA - BUKU TINGGI -1989

=====

I S I :

*

- | | |
|--------------------------------------|-----|
| 1. Baranak kambiang | 1. |
| 2. Mintak tanduak | 7. |
| 3. Dalam rimbo gadang | 14. |
| 4. Pulau raksasa | 18. |
| 5. Parentah rajo | 27. |
| 6. Mancari judu Puti Salendang Dunia | 34. |
| 7. Parang basa | 43. |
| 8. Rusio tabukak | 47. |
| 9. Panutuik | 53. |

.//.

=====

1. BARANAK KAMBIANG.

*

Kaik bakaik aka baringin,
diatuh bukik tampek tumbuahnyo;
Kaba curito kami salin,
curito guru dahulunyo.

Siakoh tasabuik dalam curito,
duo urang misikin balaki bini,
nan surang lah tuo dan surang gaek,
tapi alah salamo tu hiduik,
balun panah mandapek anak.

Lamo tapikia-pikia dek kaduonyo,
kok mati baliau isuak,
siakoh pangganti katurunan,
tando lai hiduik ateh dunia,
bak itu juo nan biaso,
adat hiduik baranak pinak,
sudah bapinak ba cucu pulo,
panyambuang katurunan salamonyo.

Ado kapado suatu malam,
bulan nan sadang bulek panuah,
bulan ampek baleh bak kato urang,
tarang kasadonyo dunia nangko,
bakatolah si laki kapado bininyo:

" Manolah kau si Intan Suri,
alah salamo tu kito kawin,
kok tak salah hambo mahetong,
alah labiah limo puluah tahun,
anak saurang balun dapek,
sia isuak pangganti kito,
kok alah mati kito kaduonyo,
sia urang kan man doakan kito?"

Duduak tamanuang malah bininyo,
ciek tidak dapek jawab,
satu tidak dapek bumi,
dijawab sajo jo aia mato,
jatuah ciek, jatuh duo,
itu nan dapek dek padusi,
isak jo sadan dalam tangih.

" Kini bak itulah nan ka elok,"
qlah manyambuang pulo lakinyo,
" tidak kasia kito mamintak,
salain kapado Allah Ta'ala,
itulah nan Maha Kuaso,
nan bakuaso dalam alam nangko,
molab kito mambaco doa,
mamintak kito pado nan satu,
kok lai kan dapek juo anak surang."

Lalu turun kaduonyo,
alah pai kapincuran,
langsuang maambiak aia sambahyang,
salasai maambiak aia sambahyang,
sambahyang tahajud kaduonyo.

Salasai baliau sambahyang tahajud,
dibaco doa dek lakinyo,
bini tingga ma aminkan sajo,
doa dibaco sungguah-sungguah,
sangaiklah khusyu' bak kato urang,
sampai balinangan aia mato,
ikolah nan buni doanyo:

" Ya, Allah ya Tuhan nan Mahakuaso,
Angkau juolah nan mangatahui kadaean hamboMu,
kok kami alah basalah, barø ampun kami nangko,
namun kami kan mamintak juo,
kapado Angkau ya Tuhan nan Mahakuaso,
karuniakanlah kami surang anak,
anak kan panaruihkan katurunan kami,
baiak laki-laki atau padusi,
baiak hitam ataupun putiah,
asa lai Angkau karuniakan,
kok binatang anak kami,
kami tarimo jup jo hati rela,
kok batu bana anak kami,
kami tarimo jo sanang hati....."

Bak itulah buni doa si laki,
walau si bini heran tacangang,
mandanga mukasuik doa lakinyo,
inyo tingga ma aminkan sajo,
sasuai kahandak nan balaku,
apo nan diberikan dek Tuhan,
ditarimo dangan sanang hati.
Allah Ta'alalah kayo sungguah,

tidak barapo bulan antaronyo,
alah manganduang bini si misikin tu,
paruik batambah gadang juo,
sananglah hati kaduonyo,
tak baranti ba syukur kapado Tuhan.

Tando anak lai kan elok,
salamo mandehnyo manganduang,
razaki murah, sihat badannya,
sabuwah tidak ado nan kurang,
tidak tabado gadangnya hati,
sambia basyukur kapado Allah.

Alah sampai ukatunyo manganduang,
iyolah sambilan bulan sapuluah hari,
alah sakik bini si patani tu,
iyo sakik kan malahiakan,
pado ampek baleh hari bulan,
bulan nan sadang bulek panuah,
alah malahiakan malah padusi tu.

Allah Ta'ala kayo sungguah,
kok nan biaso nan balaku,
takalo paja jolong lahia,
tadanga 'ngeak' sampai diliwa,
tapi pado bini si misikin iko,
baru sajo anaknya lahia,
bukannya ngeak nan tadanga,
tapi babuni suaro: " ..embeeeeek,...."
iyolah suaro anak kambiang.....

Alah dipareso dek bidan nan manolong,
iyo sabana kambiang nan lahia,

anak kambiang ampek kakinyo,
bulunyo putiah sarupo kapeh,
mambebek tidak barantinyo,
sambia malihek bapak jo mandehnyo.

Takajuiklah urang kasadonyo,
bak itu pulo mandeh jo bapak,
namun sabuwah tidak ma umpek,
malahan basyukur kapado Tuhan,
alah dapek anak kahandak hati,
sasuai jo doa nan disampaikan,
untuang lai sarupo kambiang,
kok nan lahia sarupo ula,
kan ditarimo juo jo hati rela.

Maalumlah nan lahia anak kambiang,
sato lahia sato balari,
tidak dibaduang dek bidannyo,
iyo lah lari kahalaman,
pai mananjek-manjek paga,
pai mahambua-hambua banda,
Ondeeeeeh, iyo sabana kayo Tuhan Allah....

Alah panek dek bamain,
bamain ditangah halaman jo parak,
Jalu mahambua ka ateh rumah,
pai manyusu ka mandehnyo,
di paguik jo kasiah sayang,
saketek kasiah tidak bakurañg,
santano anak ba kaki ampek.....

'Tapi sabuwah nan Maheran,

tidak barapo bulan antaronyo,
kambiang batambah gadang juo,
kini alah jaleh bantuak badannya,
bukanlah inyo sabangso kambiang,
tapi iyolah bangso biri-biri,
dinamoilah bolau tu jo si Domba.

Sabuwah pulo nan Maheran,
tidak barapo lamo antaronyo,
si Domba pandai ma ngecek-ngecek,
mangecek sarupo urang bana,
heranlah urang mandangkan,
biri-biri nan pintar babicaro,
tidak ubahnya jo anak urang=bana.

Sahingga ado urang manamokan,
si Domba jo Domba Siluman.....

.///.



..... orang tua si biri² amat sajang djuga kepada anaknya.

2. M I N T A K T A N D U A K

*

Tukang mambawo tukua jo pahek,
nan lupo alah dikana-kana,
kok lupo lah payah dek manginjek;
Nan tak dilihek alah dilihek,
nan balun didanga alah didanga,
kambiang nan pandai mangecek-ngecek.

Alah sahari duo hari,
babih hari batuka pakan,
pakan lah baganti dangan bulan,
si Domba batambah gadang juo,
gadangnjo bak di hambuih-hambuih,
tumpuan kasiah mandeh jo bapak,
labiah dari ba anak manusia,

Bilo hari alah siang,
si Domba lah pai bamain-main,
tidak bamain karumah sikolah,
maalumlah awak bakaki ampek,
tidak pulo jo bocah-bocah,
jo bodah anak manusia,
tapi bamain katangah padang,
tampek kambiang mancari makan,
bamain basamo jo anak binatang,
iyolah anak biri-biri.

Ado kapado suatu hari,
Si Domba pulang dangan manangih,
mukasuiknyo mambebek ba ulang-ulang,
ggak panjang lagu bebeknyo,
mandeh alah mangarati,
anaknyo pulang mambawo tangih,
antah apo sabab karanonyo.,
" mbeeeeek,...mmmbeeeeek,... ."

Alah batanyo mandeh kanduangnyo,
" Anak denai si Buyuang Domba,
apo sabab karanonyo,
Buyuang pulang mambawo tangih,
cubo tarangkan padu mandeh!"

" Mmmbeeeeek,...mmmbeeeeek, " jawab si Domba,
" kawan hambo pagaluik bana,
paruik disodok jo tanduaknyo,
kapalo diadu. jo tanduaknyo,
sakik rasonyo pasandian,
hambo tidak dapek mambaleh,
sabab hambo tidak punyo tanduak....."

" Anak denai si Buyuang Domba,
itu tak usah waang risaukan,
jaan waang bawo masuak hati,
sabab baa dek bak itu,
waang iyolah tidak batanduak,
nanti sampai waang gadang,
kan tumbuhan juo tanduak waang."



Seekorpun tak ada jang berani lagi padanja.

" Tidak mandeh," jawab si Bujang Domba,
" Hambo tak suko manarimo,
kok lai sayang mandeh ka hambo,
balikan juo hambo tanduak,
buliah dilakekkan di kapalo,
kawan nak jaan lalu lalang sajo,
kok tidak nan bak itu,
marasai juo badan hambo,
kanai tanduak tiok hari.
mandeh juo nan kan·sangsai...."

" Ondeeeeeh, nak," jawab mandehnyo,
" Sampai sakarang maso kini,
nan satahu bapak jo mandeh,
alun panah dijuwa urang,
baiak di toko atau di kadai-kadai,
iyolah tanduak biri-biri,
sabab baa dek bak itu,
tanduak tu tumbuah sandirinyo."

Usah si Domba akan antok,
jaankan hatinyo nan kan sanang,
batambah kareh suaro tangihnyo,
hilanglah aka mandeh kanduang,
dibawo ba iyo jo lakinyo.

Salasai bapikia-pikia keduonyo,
galah dihinok dimanuangkan,
lalu bakato molah bapaknyo:

" Kok sapanjang pandapek hambo,

nan dikampuang kito nangko,
ado apa basi sabuwah, (apa = apar besi)
cubolah kau pai ka kiun,
cubo tanyokan ka tukang apa basi,
kok lai pandai inyo mambuwek,
iyo mambuwek tanduak biri-biri,
kok lai pandai bolau tu,
suruah buwekkan tanduak sapasang,
bara haragonyo kito bayia."

Mandanga kato damikian,
alah pai mandeh si Domba,
pai kasabuwah apa basi,
tidak jauah dari rumahnyo,
alah basuwo tukang disanan,
disampaikan malah mukasuik hati,
iyo nak mambuwek tanduak biri-biri,
mandanga pesanan dari mandeh,
galak tabahak tukang basi,
dipilin-pilin sisunguik nan panjang,
lalu manjawab inyo sakali:

" Manolah kakak nan batanyo,
salamo hambo hiduik diateh dunia,
salamo hambo bakarajo disiko,
balun panah urang mamasan tanduak,
hanyo nan ado iyolah mambuwek pakakeh,
kok ladiang jo sabik,
kok pangkua jo pisau,
lah sakik garan kakak nangko,
pulanglah kakak babaliak,
kami usah digenggu juo."

Namun mandeh alun manyarah,
ditarangkan baliak kapado tukang,
bahaso anaknyo iyolah biri-biri,
inyo tadagak mamakai tanduak,
mintak dibuwekkan tanduak sapasang,
bara haragonyo akan dibayia."

Galak gadang si tukang basi:
" Kok bak itu kato kakak,
tahulah hambo kini nangko,
kakak nan mandeh si Bujang Domba,
namun bak itu kato kami,
salaruik salamo nangko,
kami balun panah mambuwek tanduak,
mambuwek taji lai mancubo,
tapi alah lamo maso kutikonyo."

Lah panek tangka batangka,
lah puweh rundiang barundiang,
pulanglah mandeh jo tangan hampo,
tidak tabawo apo di mukasuik,
sampai di rumah duduak tamanuang,
mangana kahandak tidak balaku.

Sirah sirah buwah semangko,
dibukak kulik tampaklah isi;
Baraliah kaba sakutiko,
baraliah kapado sū tukang basi.

Alah sapaningga mandeh si Domba,
tukang mukasuik mambuwek pakakeh,

entah pangkua antah tambilang,
antah pisau atau nan lain,
diambiak malah basi sakarek,
lalu dimasuakkan kadalam api,
dipompa api dek anak buwahnyo,
lah sirah basi dalam baro,
tapi sabanta antaronyo,
lah habih sajo basi jadi abu,
lah diambiak sapotong lai,
lalu dimasukkan kadalam baro,
tidak barapo lamo antaronyo,
basi manjadi dadak sajo,
hilang tidak mambari bakeh,
beran tacangang si tukang basi.

Alah di hinok di manuangkan,
di tungkuik ditilantangkan,
takana pasanan mandeh si Domba,
sambia ba pikia-pikia surang:
" Antah kiramat si Buyuang Domba,
sabuwah karajo indak manjadi,
kok diambiak sabuwah lai,
kok batambah rugi juo."

Alah dipikia dimanuangkan,
disuruah malah . . . anak buwahnyo,
dihimbau baliak mandeh si Domba,
ditanyokan bana elok-elok,
dibawo pulo anaknyo kasanan,
di ukua kapalo jo nan lain,
lalu di ambiak basi sapotong,

basi tidak hancua lai,
alah di tampo basi nantun,
dibuwek malah tanduak sapasang,
srupo urang mambuwek taji,
kok taji di kaki ayam,
kok tanduak di kapalo biri-biri.

Alah salasai tanduak dibuwek,
lalu dipasang di kapalo si Domba,
tapasang arek di kapalo,
srupo tanduak sabananyo,
tidak tabado gadang hati,
iyolah si Buyuang Domba kito,
taruh balari katangah padang,
dicari kawan nan manggaduah,
dibawo inyo bacakak,
kapalo diadu jo kapalo,
habih takalukua kapalo kawan,
surang tidak malawan lai,

Nan mandeh si Buyuang Domba,
alah batanyo ka tukang basi,
bara harago tanduak nantun,
lalu manjawab si tukang basi:
" Kakak juo janyo hambo,
tanduak usah kakak bayia,
paresan hambo ka anak kakak,
anak nan lucu kiramat pulo."

Sananglah hati mandeh kanduang,
pulang babaliak basanang hati.

3. DALAM RIMBO GADANG.

*

Karatau madang dibulu,
babuwah babungo balun;
Marantau hambo dahulu,
dirumah paguno balun.

Ado kapado suatu malam,
bakato si Domba kapado mandeh,
sarato pulo pado bapaknyo:
" Mandeh juo kato hambo,
sarato kapado bapak hambo,
hambo mukasuik pai marantau,
izin jo rela dari mandeh jo bapak."

Handanga kato damikian,
takajuik kaduo orang gaeknyo,
lalu manjawab malah mandeh:
" Anak denai si Domba sayang,
usah anak sabuik pai marantau,
mandeh jo sia bang tinggakan,
kito balun panah bacarai,
samantang waang balin dari nan lain,
sayang jo kasiab bak itu juo.

Sabuwah pulo oi, nak kanduang,
waang tak sarupo jo nan lain,

Kok tibo sangsaro jo bahayo,
kasia anak kan mangadu,
awak tak samo jo nan lain."

Manjawab dang si Domba:

" Kok satantang mandeh camehkan,
mandeh tak usah cameh bana,
kito kan lai be Tuhan nan manjago,
dimano kito tatap dijagoNyo,
baiak siang ataupun malam,
lapehlah hambo dek mandeh bapak,
bisuak hari hambo barangkek."

Tibarau batang galagah,
tumbuhan sarumpun jo kaladi;
Ditagah tidak tatagah,
dilapeh malah nan jadi.

Akah barisuak hari siang,
mamintak izin si Bujang Domba,
mamintak izin kapado rang gaeknyo,
lalu bajalan nyo sakali,
sarupo lonjak labu tabanam,
tidak takana di nan lain,
bajalan taruih masuak rimbo,
iyo kadalam rimbo gadang,

Rimbo batambah langang juo,
balun panah dijajak manusia,
.banyak binatang didalamnya,
harimau jo ula baruwang gadang,

namun si Domba tidaklah takuik,
taruin yoh juo bajalan,
tidak malengong kabalakang lai,
dirancah samak jo baluka,
ditubuni jurang bukik didaki,
arah tujuan balun obeh.

Dek lamè lambek bajalan,
alah tasirobok saikua harimau,
iyo saikua harimaugadang,
gadang nan tidak gadang hana,
kurang saketek dari bapak kudo
lalu bapikia harimau nantun:
" Iko molah razaki lah datang,
laikoh kan kanyang paruik den,
dek kambiang sagadang iko?"

Lalu di tangkok kambiang nantun,
dihambua jo hambua dapo,
harimau tibo Domba mailak,
alah tasungkua kabatang kayu,
tabik bangih harimau nantun,
lalu di cokok sakali lai,
Domba mailak sambia mananduak,
lah kanai paruik harimau,
kanai tanduak nan batuwah,
tabusai malah paruik panjangnyo,
tabusai alah bajelo-jelo,
mati nan jadi harimau nantun.

Taruih bajalan si Bujang Domba,
dimano malam lalu baranti,
lalok dibawah batang kayu,
hari siang bajalan pulo,
lah sampai di kaki gunuang,
batamu saikua ula gadang,
gadang nan tidak gadang bana,
banyo : sagadang batang karambia,
panjangnya tak kurang duo puluah,
iyo duo puluah dapo.

Namun ula tidak manggaduah,
itulah nan hanamo ula nago,
diagiah Domba babagai ilimu,
dibari pulo mustiko sabuwah,
untuak tangka hiduik didunia,
sananglah hati maso itu,
tarukh juo inyo bajalan.

Alah saheri duo hari,
alah sapakan duo pakan,
si Domba taruih bajalan,
masuak rimbo kaluwa rimbo,
alah sampai ditapi lauik,
lauik nan sangaik gadang bana,
tidak tampak ujuang tapinyo,
aia sajo bakuliliang,
sasayuik-sayuik mato mamandang
batamu langik jo ujuang lautan.
ufuak langik dikatokan urang.....
.//.

4. P U L A U R A K S A S A .

*

Lauik banamo lauik Sakutoro,
pmbaknyo sangaiklah gadang;
Kito taruihkan malah curito,
Domba ditapi lauik gadang.

Alah dipandang-pandangi bana,
lautan nan sangaik gadang bana,
tidak tampak bateh jo tapinyo,
ombak nan sangaik gadang pulo,
badabua-dabua salalu ka pasisionyo,
antah lautan apo kan namonyo.

Disanan manyaru si Domba kiramat,
dikana-kana amanah ula gadang,
ado sabanta antaronyo,
alah tasumbua kapalo dari lauik,
iyolah kapalo ikan rayo,
gadangnyo sagadang kapa ketek,
lalu bakato ikan rayo:
" Mano cucu den si Bujang Domba,
manga ninik cucu himbau,
handak kamano garan cucu,
rantau dimano kan dituju,
negari mano kan ditampuan?



Lalu berenanglah ikan itu dengan amat kentjangnja

Alah manjawab si Bujang Domba:
" Manolah ninik kato hambo,
sababnyo ninik hambo saru,
tolong antakan hambo kakiun,
iyo ka pulau raksasa,
hambo baniat nak kasanan,
ado mukasuik dalam hati,
alah disuruah naiak si Bujang Domba.

Duduaklah Domba dipungguang ikan,
iyo dipungguang ikan rayo nantun,
lalu maluncua si ikan gadang,
sarupo torpedo maso kini,
bakuwak aia dibuweknyo,
sangaiklah kancang ikan baranang,
Domba bagayuik elok-elok,
bagayuik di sisunguik ikan gadang,
manampuan lautan nan bagalombang

Dek lah lamo ikan baranang,
alah barisuak pagi hari,
mato ari jolong tabik,
lah sampai di pulau sabuwah,
antah apo namo pulaunyo,
turunlah si Domba kadarayan,
bacarailah dangan ikan rayo,
sikua masuak kalautan, surang naiak kadarek,
abajalan bagontai-gontai,
saketek tidak manaruh takuik,
namonyo Domba kiramat hiduik-hiduik.

Dek lamo lambek bajalan,
sampailah Domba ditapi kampuang,
kampuang nan ganjia bana,
kok karambianyo sangaiklah tinggi,
kok rumahnyo gadang-gadang,
namonyo sajo pulau raksasa.
berantilah Domba ditapi parak.

Duduak baranti Domba nantun,
ditapi parak sabuwah,
mantimunnyo bagayutan,
jaguangnyo sadang babuwah,
sangaiklah subua kalihatan.

Alah diambiak bu wah mantimun,
dimakan sakanyang-kanyang paruik,
diambiak pulo bu wah jaguang,
dimakan sajo matah-matah,
alah tabadai Domba kakanyangan.

Ado sabanta antaronyo,
lah tagak si Bujang Domba,
lah ditanduak-i batang mantimun,
di tanduak-i pulo batang jaguang,
mantimun jo jaguang lah habih rusak,
sarupo dilando gajah sakawan,
sabuwah tidak elok lai,
lah sudah karajo nan bak kian,
pai lalok si Domba nantun,
pai lalok ka ateh sabuwah batu,
batu dakek parak nantun.

Tidak lamo pulo antaronyo,
lah datang urang nan punyo parak,
urang baduo laki bini,
tapi balain dari urang biaso,
tingginya labiah tigo dapo,
kakinyo sagadang batang karambia,
pangka langan sagadang batang pisang,
bangso raksasa disabuik urang,
mukasuik kan maambiak basia parak,
baiak jaguang jo mantimun,
dibawo karanjang sagadang rumah,
untuak bakeh jaguang jo mantimun.

Alah sampai di tapi parak,
heran tacangang kaduonyo,
dilihek parak alah rusak,
mantimun lah habih pacah-pacah,
jaguang lah habih patah-patah,
sabuwah nan tidak elok lai,
bagai dilando angin bадai
apokoh sabab karanonyo?

Alah dipareso kasuok jo ka kida,
apo panyabab parak hancua,
apokoh gajah atau ula gadang
tampaklah mukaluak saikua,
sadang lalok diateh batu,
heran tacangang raksasa nan baduo.

Lah bakato raksasa nan jantan:
" Hoooooi, iko malah panyababnyo,

ado mancik pakai tanduak,
mołah kito cakau mancik iko!"
ruponyo si raksasa balun tahu,
biri-biri disangko mancik juo.

Mandanga suaro raksasa,
suaro bak bagai gunuang runtuah,
takajuik malah si Bujang Domba,
alah tagak mamasang langkah,
tampaklah raksasa nan baduo,
takuik jo ganta tidak ado.

Nan raksasa balaki bini,
lalu dijangkau jo ampu jari,
bagai kito mancakau jangkariak,
lalu ditangkok ba capek-capek,
usah si Domba nan kan dapek,
tangan bininyo nan ta elo.

Si Domba alah ma lompek-lompek,
malompek-lompek sapanuah parak,
ma ilakkan tangan raksasa,
malihek sigap mancik nantun,
batambah bangih si raksasa,
lalu di tanduak langan si raksasa,
kanai tanduak langan raksasa,
marauang sampai kateh langik,
dek berang bacampua bangih.

Mandanga rauang si raksasa,
alah datang kawan-kawannya,

lai sabanyak sapuluah urang,
gadang badagok kasadonyo,
ado nan bajangguik panjang-panjang,
sadapo pamjang jangguiknyo,
alah batanyo nan surang:

" Oi, kawan nan baladang,
pagi-pagi alah heboh-heboh,
apokoh sabab karanonyo,
cubo tazangkan pada kami!"

Lah manjawab raksasa paladang:

" Tidakkoh kalian lihek parak wak den,
alah habih kanai lanyau,
sarupo dilanyau gajah sakawan,
sabatang tidak elok lai,
kok panyabang karanonyo,
itulah mancik pakai tanduak,
alah payah den dek mancakau,
tapi tidak kunjuang dapek juo."

Alah tagalak kawan-kawannya:

" Ondeeeee, iyo sabana bodoh waang,
hanyo mancik sagadang kuku,
tidak dapek dek waang manangkoknyo,
hoi, kawan-kawan, molah kito pacokokkan,
kito acokokkan mancik nantun,

Alah gaduh dalam parak nantun,
mukasuik mancakau binatang nan mangaduah,
iyolah si Bujang Domba,
nan iyo si Bujang Domba,

tidak barasak dari sanan,
manggalipik-galipik dikaki raksasa,
dari suok lari ka kida,
dari kida mahambua ka suok,
raksasa lah heboh mancakaunyo,
usahkan biri-biri nan kan dapek,
bolau jo bolau alah barantuakan,
nan duo urang raksasa
samo ba adu kapalonyo,
kapalao bangkak sagadang katidiang,
dan lain pulo tatumbuak diparuiknyo,
tadongek gadang nan kawannya,
tahambua cirik kuniangnyo,
Allu rabbi kan busuaknyo,

Alah badatangan pulo kawan-kawannya,
sakampuang raksasa nantun,
batambah bangih si Bujang Domba,
alah ditanduak mano nan dakek,
habih tabusai paruik panjang,
kok nan parak tampek nantun,
alah sarupo medan paparangan,
alah sarupo sawah molong di rancah,
alah banyak nan luko kaum raksasa,
nan mati ado pulo,
namun nan mancik pakai tanduak,
usahkan dapek kanai tangkok,
tasinguang sajo balun dapek.

Alah panek dek baparang,
nan dicakau tak kunjuang dapek,

tak ubahnyo jo parang bana,
lađi datang saurang kaum raksasa,
datang mambawo bandera putiah,
lah dikibakan bandera nantun,
tando takluak kaum raksasa,
tagak si Domba diateh batu,
alah manyambah raksasa kasadonyo.

Alah tahu malah kaum raksasa,
si Domba nan sagadang nantun,
tidak akan talawan dek bolau,
Domba antah domba kiramat,
domba kiramat sakši pulo,
mangaku kalah hanjyo lai.

Alah bakato molah jurubicaronyo:
surang raksasa nan tinggi gadang:
" Ampunlah kami Angku Domba,
kami tidak malawan lai,
kami manyarah kini nangku,
buweklah apo nan taragak,
kami tidak malawan lai.

Mandanga katō jurubicaronyo,
lah tagak si Bujang Domba,
di dakek-i sabatang pohon karambia,
lah ditanduak karambia nantun,
ondeeeeh, alah tabongka karambia nantun,
tabongka jo urek-ureknyo,
batambah takuik sagalo raksasa,
manggigia sagalo bulu badannya.

Lah tagak Domba diateh batu,
lalu bakato kapado kaum raksasa:
" Manolah kalian kasadonyo,
kalian alah sudah takluak,
usah kalian malawan lai,
kok ado nan baniat kan malawan,
hambo bunuh mati kini nangko.
Kini bak tulah nan ka elok,
hambo jadi rajo di nagari iko,
bawolah hambo ka ustano,
kok tidak nan bak itu,
hambo hancuakan nagari tuan-tuan."

Tapi nan kaum raksasa nantun,
surang tidak malawan lai,
alah diarak Domba nantun,
diarak kadalam ustano,
manjadi rajo bolau disanan,
iyo dinagari kaum raksasa.
bagala Tuanku Domba Sari Alam.

.//.



Sang domba sekarang sudah menjadi radja dinegeri raksasa.

5. PARENTAH RAJO.

*

Urang Medan ka Samalanga,
lalu di kota banamo Langsa;
Nan tak didanga alah didanga,
Domba manjadi rajo raksasa.

Alah sahari duo hari,
alah sapakan duo pakan,
Domba alah manjadi rajo,
iyo rajo dinagari raksasa,
parentahnya adia bukan kapalang,
samantang bolau tu bangso binatang,
bagak nan bukan alang-alang,
sikua tak ado barani malawan,
kucuik takuik kasadonyo.

Kini alah datang parentah rajo,
disampaikan kapado sagalo rakyatnyo,
apo bumi parentah nantun,
rakyat raksasa disuruh mananam labu,
iyo mananam labu aia,
laikoh sanak panah mandanga,
labu banamo labu aia,
mangko banamo sarupo itu,
labu gunonyo kan bakeh aia.

Kok kito bolak baliak buku sajarah,
iyo sajarah nagara kito,
pado zaman Japang mamarentah,
ado parentah mananam jarak,
rapek papek kasadonyo,
tiok rumah mananam jarak,
nan manuruik kaba baritonyo,
minyaknyo jarak tu nan paguno,
sarupo itu pulo parentah si Domba.

Hebohlah saluruah nagari raksasa,
satiok rumah mananam labu,
alah lamo jo lambek antaronyo,
lah babuwah lambu aia tu,
kok buwahnyo iyolah gadang-gadang,
tidak sarupo labu nagari kito,
ciek labu nagari raksasa,
samo gadang jo sabuwah tong.

Alah gadang buah labu nantun,
lalu diambiak molah buwahnyo,
dibananakan kadalam tabek,
atau kadalam rawang-rawang,
supayo habih isi jo tampangnyo,
mano buwah nan barasiah,
dibawo molah ka ustano rajo,
alah batumpuak buah labu,
lai agaknyo satinggi bukik.

Lah habih takumpua buah labu,
tibo parentah nan kaduwo,

supayo labu nan sudah elok,
kini di isi jo ameh perak,
atau intan, bamacam parmato,
kasadonyo dikumpaakan dihalaman ustano.

Kok parentah rajo Domba nantun,
tidaklah sulik dek kaum raksasa,
sabab baa dek bak itu,
dinagari raksasa nantun,
ameh sarupo candawan tumbuah,
intan bak kasiak dipulau,
tidak barapo lamo antaronyo,
alah batimbun labu nantun,
ba isi ameh jo intan podi,
tidak takiro-kiro banyaknya.

Alah salasai kasadonyo,
ado kapado suatu hari,
alah batitah Tuanku Domba Sari Alam,
kapado hamba rakyatnyo raksasa:
" Manolah kalian kasadonyo,
alah salamo tu hambo disiko,
namun nan kapado badan hambo,
tidaklah disiko salamonyo,
duo hari lai hambo babaliak pulang,
pulang kanagari kampuang hambo,
gantilah hambo dek kalian,
carilah majo mano nan elok,
usah dicinto juo badan hambo.

Salaind dari padò itu,
antakan hambo dek basamo,
barapo urang nan baguno,
untuak mambawo labu nantun,
sadiokan pulo kapa sabuwah,
antakan hambo ka kampuang hambo,
lah sampai kito disanan,
tuan-tuan babaliak pulang,
usah tuan-tuan tatap disanan,
budi sajo nan kan tingga."

Alah tibo maso kutikonyo,
barangkeklah Tuanku Domba Sari Alam,
dilapeh rakyat ^{jo} hati suci,
dilapeh jo hati ibo,
sarato babarapo urang raksasa,
kasadonyo mamikua labu aia,
labu aia nan bassi ameh,
iyolah ameh intan jo podi.

Salamo lambek dijalan,
lah naiak kapa dilautan,
lah salamo pulo balayia,
bajalan pulo dalam rimbo,
lah sampai ka tapi kampuang,
iyo kampuang si Bujang Domba,
alah baranti dalam rimbo nantun,
tibo parentah dek Tuanku Domba.

Manolah kalian kasadonyo,
ikolah parentah hambo nan ta akia,

babatlah tumpak rimbo nangko,
Bangunlah disiko sabuwah kqmpuang,
tagakkan pulo rumah sabuwaty,
rumah tabuwek dari ameh,
halamannyo bakasiak intan podi,
cukuik bapaga sakulliangnyo,

Alah sibuik sagalo raksasa,
mambuwek apo parentah rajo,
tidaklah susah dek bolau-bolau tu,
sarupo kito mambuwek mainan,
mainan barupo rumah-rumah ketek,
namun cukuik sagalo pakakehnyo,
tidak barapo lamo antaronyo,
alah salasai rumah nantun,
rancak nan bukan alang-alang,
namun nan ustano rajo,
tidaklah sampai sarancak nantun,
sabuwah tidak nan kurang,
sanan bakato Tuanku Domba Sari Alam.

" Manolah tuan-tuan kasadonyo,
alah sampai dikoko kito bacarai,
hambo ucapkan tarimo kasiah,
pulanglah tuan-tuan babaliak,
usah tuan tatap disiko,
itu mangganggu dunia manusia,
ba baliak pulang molah tuan-tuan,
sampaikan salam hambo ka nagari.
Alah babaliak sagalo raksasa,

babaliak pulang kanagarinyo,
tinggalah si Bujang Domba,

Lah pulang kaum raksasa,
pulang babaliak kanagarinyo,
Si Domba alah bajalan pulo,
manamui mandeh sarato bapaknyo,
didapatinya kaduo rang gaeknyo,
lai sihat-sihat sajo,
hati bagagak padō anak,
sadang anak dimano garan tu kini,
kaba tidak barito tidak,
antah lai salamat pajalanan,
namun dalam padō itu,
alah pulang sajo anak tampek sayang.

Alah barisuak siang hari,
dibawolah kaduo rang gaeknyo,
dibawo kadalam rimbo nan gadang,
kaduo urang tua nantun,
saketek tidak molah tahu,
si Bujang alun bakaba bazarito,
kamano rang gaeknyo kan dibawo,

Alah sampai didalam rimbo,
dakek rumah ameh nantun,
heran tacangang mandeh kanduang,
heran malihek rumah rancak,
rumah tabuwek dari ameh,
bakilauθkilau kanai paneh,
sakik mato mamandangi.

Bakato malah si Bujang Domba:
" Manolah bapak mandeh hambo,
usah mandeh tagak tacangang,
ikolah kini rumah kito,
ado gudang sabuwah,
panuah baisi ameh intan jo podi,
ugiahlah rang kampuang saketek surang,
suruah pindah inyo kasiko,
buweklah rumah jo nagari,
kito ramikan tampek nangko,
mandeh usah lupo bana,
kapado bapak tukang basi,
agak labiahkan bolah saketek.

Tidak barapo lamo antaronyo,
alah rami dalam rimbo nantun,
alah badiri kampuang sabuwah,
rumahnyo sangaik rancak-rancak,
urang kayo kasadonyo,
aman santoso sanang hiduiknyo.
dinamokanlah kampuang: Tanjuang Ameh.

.//.

6. MANCARI JUDU PUTI SALENDANG DUNIA.

*

Usah ditabang batang nangko,
batang di paluik urek baduri;
Kaba baralitik sakutiko,
baraliah ka Puti dalam nagari.

Tasabuik kampuang si Bujang Domba,
tamasuak sabuwah karajaan,
diparentah rajo sangaik adia,
baliau baputo surang sajo,
iyolah saurang puti nan sangai^k rancak,
banamo Puti Salendang Dunia.

Nan karancakan Puti Salendang Dunia,
lah tamasahua ka barat jo katimua,
tabu urang^k kasado nagari,
roman rancak tidak bandiangnyo,
banyaklah rajo bakahandak,
untuak jadi minantu bolau,
tapi sabuwah balun batarimo,
bak itu pulo anak rajo-rajo,
ingin mamatiak bungo kambang,
namun sampai salamo itu,
surang balun nan ba untuang^k,
mamatiak bungo sadang kambang.

Moko padu akia curitonyo,
dibuktaklah galanggang dek rajo nantun,

dibukak siang-siang malam,
diundang anak rajo-rajo,
supayo nak samo hadir digalanggang,
sabab rajo kan mamiliah minantu,
untuak suami Puti Salendang Dunia,
Puti nan takaba tabarito,
rancak nan bukan alang-alang,
sampai kalangik tabarito,
tidak ado tandiangnyo puti nantun,
antah kok bidadari ateh langik.

Alah tibo maso kutikonyo,
galanggang alah muloi rami,
dari mano urang tak datang,
dari bukik alah manurun,
dari lurah alah mandaki,
bapakaian rancak kasadonyo,
suliklah mato kan mamiliah,
samo hebaik kasadonyo.

Kok dipilih-pilih nan bak kian,
ragulah mato kan mamiliah,
surang rancak, nan lain elok,

Alah sahabih-habih pikia,
dimintak patimbangan ka nan basamo,
baik kapado manti jo panghulu,
atau kapado alim jo ulama,
urang cadiak dalam nagari,
dapeklah satu kaputusan:

Alah dibuwek bungo sabuwah,

bungo tabuwek dari karateh,
lah sūdah bungo dābuwek,
lalu dimantokan dek surang dukun,
manjadi bungo hikmat bak kato urang,
baa caronyo sabalah sanak sakutiko!

Lalu dibuweklah pangumuman rajo,
pado hari nan ditantukan,
disuruah bakumpua sagalo calon,
iyolah calon minantu rajo,
bakumpua dibawah maligai puti,
lalu dicampakkan bungo hikmat,
siapo urang nan ditimpo bungo,
itulah garan jadi minantu rajo.
heranlah urang mandangkan,
balun panah dilakukan urang,
mancari judu dangan bungo,
bungo nan alah dimantokan,
pandai mancari sandirinyo.

Alah tibo ukatu han ditantukan,
bakumpualah urang dibawah maligai,
iyolah pangeran anak rajo-rajo,
namo maharok malah kasadonyo,
supayo bolau ditimpo bungo,
untuak jadi suami Salendang Dunia.

Balun pulo urang manonton,
rapek papek kasadonyo,
manyamuik urang kalihatan,
bakumpua dibawah maligai Puti.

Alah tadanga pangumuman rajo,
bahaso bungo kan dijatuahkan,
nan manjatuahkan puti sandiri,
badampuang darah kasadonyo,
bak galombang ditangah lauik,
siakoh urang kan ditimponyo,
tambahan kato pangumuman:
kok lah dapek calon minantu rajo,
galanggang taruih dibukak,
manjadi galangganag alek kawin,
pakawiyan Puti Salendang Dunia.

Samo maningadah mahadok ka ateh,
iyo kapuncak maligai puti,
tampak taputiah tangan tuan puti,
ditangannya tapacik bungo sakuntum,
bungo hikmat pancari judu,
tatahan angok kasadonyo,
badantuang-dantuang darah di dado....

Alah dicampakkan molah bungo,
bungo palangi ba rono-rono,
lah jatuah bungo nantun,
lah naiak pulo ka udaro,
ba bega-bega sarupo buruang,
bak kan jatuah tabang pulo,
begai ado nan manabangkan,
heranlah urang mamandangi,
Alah tabang barapo lamonyo,
alah malayok bung^o nantun,

malayok kabaliak maligai nantun,
alah tajatuah bungo nantun,
tantu dikapalo saurang-urang,
alah balarian pagawai rajo,
mamareso dimano jatuah bungo tu,
alangkah heran sagalo pagawai,
bungo lah hinggok di kapalo,
bukan dikapalo anak rajo,
tidak dikapalo pangeran-pangeran
malah tidak di kapalo urang,
bungo lah hinggok di kapalo kambiang,
sadang tagak di dakek maligai.

Lalu diambiak bungo nantun,
diambiak dek pagawai nan batugeh,
lalu dilaporkan kapado rajo,
bahaso bungo alah hinggok,
tapi tidak dikapalourang,
tapi iyolah di kapalo biri-biri.

Mandanga laporan damikian,
heran tacangang rajo nantun,
tidak disangko kan bak itu,
tibo parentah maso itu,
bungo dicampakken sakali lai.

Diantakan bungo babaliak,
disarahkan kapado Puti Salendang Dunia,
supayo dicampakkan bungo baliak,
alah di ulang mancampakkannya.

Tampak tabayang langen nan putiah,
putiah bak lilin dituwang,
iyolah langan tuan puti,
sadang mamagang bungo hikmat,
lalu dicampakkan pulo bungo nantun.

Bungo alah jatuah kabawah,
lalu malayang balékak ka ateh,
tabang babega ka ateh langik,
sampai manyisih-nyisiah awan,
tampak sakilek lah hilang pulo,
alah turun tampaknya kabawah,
malayok-layok sarupo cako,
nan bak kan jatuah lah naiak pulo,
heranlađ urang mamandangi,
iyo kiramat bungo nantun,
tidaklah salah dukun mambuwek.

Ayah tabang malayang pulo,
lah jatuah kabawah bungo nantun,
lah balarian sagalo pagawai,
mamareso bungo dima hinggoknya,
ondeeeeeeh,... hinggok dikapalo kambiang juo.

Dilaporkan pulo kapado rajo,
bahaso bungo alah hinggok,
hinggok dikapalo biri-biri,
sangaiklah heran rajo mandanga,
lalu dibuwek malah kaputusan:

Lah duo kali bungo dicampakkan,

hinggoknya di kapalo kambiang,
apokoh sabab karanonyo,
surang tidak dapek manjawab,
Allah Ta'ala kayo sungguah,
sentah kok itu calon minantu rajo.

Diumumkan molah ka nan basamo,
lah duo kali bungo di layangkan,
hinggok dikapalo sikua biri-biri,
kan dijatuahkan sakali lai,
kok hinggok juo disanan,
kambiang diambiak kan minantu,
bak itu putusan dari rajo.

Tinggi batangnyo pohon langsek,
labiah tinggi dari mangkjdu;
Alun dilihok alah dilihok,
bungo karateh pancari judu.

Alah tabayang pulo tangan nan putiah,
dijatuahkan bungo sakali lai,
saband heran manakjubkan,
Kini jatuahnyo sabanta sajo,
tidak ba bega-bega diudaro,
jetuahnyo capek mandareh sajo,
langsuang hinggok dikapalo biri-biri,
heran tacangang sagalo pagawai,
alah ditangkok biri-biri nantun,
sabuwah pulo nan Maheran,
bungo tak amuah tangga lai.
lakuk kuat dikapalo biri-biri.

Alah diarak biri-biri nantun,
dibawo manghadap kapado rajo,
heranlah urang mancaliak,
nan tak dilihek alah dilihek,
kambiang kan jadi minantu rajo,
ondeeeeh, baalah kan hebaik curitonyo.

Alah dududuakkan biri-biri diateh palamina,
bolau manuruik sajo, baa janyo urang,
si kambiang alah manuruuk sajo,
epokoh ado hikmat didalamnyo,
surang balun ado nan tahu,
Tuhan sajo molah nan ka tahu.

Heranlah urang mamandangi,
rajo baminantu biri-biri,
ado pulo nan ma ejek-ejek,
semo mambebek samo bolau,
sembia ma uruuk-uruik jangguik,
tapi apo kan disabuik,
garak lah sudah sajak dahulunyo,
sajak dirahim bundo kanduang,
kuto tingga manapati.

Ado pulo nan mancamooh:
itulah rajè banyak piliah,
kasudahan baminantu binatang,
Tasabuik calon-calon nan banyak tu,
pedo hari sahari itu,
pulang babaliak kanagarinyo,



..... sebagai suami isteri.

mambawo baragam curito,
ado nan mambawo sakik hati.

Urang dipakan manjuwa balon,
dibali dek urang babalanjo;
Kito tinggakan barito calon,
kito kabakan tantang puti rajo.

Alah salasai akad nikah,
kawinlah Salendang jo si Domba,
di masuakkan kadalam biliak dalam,
biliak anak daro nan sangaik santiang,
bakulambu suto buatan Cino,
barombak-rombak ba mego-mego,
bakasua taba baaleh suto,
penuah dek baun minyak harum,
harumnya satahun pajalanan.

Bak itulah nasib puti rajo,
nan banamo Puti Salendang Dunia,
hiduik baduo jo lakinyo,
lakinyo iyolah si Biri-biri.

Ujuang talang usah di papek,
dijadikan pangabek banang suto;
Bak itulah curito kami dapek,
bohong urang kami tak sato.

.//.

7. P A R A N G B A S A .

*

Batang tibarau buwekkan dindiang,
untuak paampang aka tubo;
Malang cilako rajo kambiang,
minantu dapek, parang tibo.

Lah langang dalam koto jo nagari,
galanggang lah usai langang pulo,
tamu alah babaliak pjlang,
bak itu pulo anak rajo-rajo,
mahapuih bibia kasadonyo,
namun dibaliak padu itu,
tabik dandam dihatinyo,
rajo dianggap alah mahino,
iyolah mahino sagalo anak rajo,
apo sabab dek bak itu,
labiah kambiang dari mareko,
itulah asa pangka balanyo.


Mano nan sangaik manyimpan dandam,
dibantuak pasatuan antaro mareko,
disusunlah sabuwah angkatan parang,
tidak barapo lamo antaronyo,
datanglah manyarang kanagari nantun,
iyo kanagari Salendang Dunia.

Sangaiklah takajuik dalam nagari,
disusun angkatan ba capek-capek,
untuak palawan musuah nan datang,
disiapkan sagalo alat sanjato,
parang tidak ta ilakkan lai,
basoboklah musuah ditangah medan,
lalu baparang kaduonyo,
manurmuik adat maso dahulu,
jikok tajadi paparangan,
parang basosok samo surang,
sia nan bagak inyo nan manang.

Alah usai parang sahari,
alah sahari duo hari,
alah sampai ka ampek hari,
batambah payah bapak Salendang,
sabab baa dek bak itu,
urang alah bapadu padan,
alah basatu banyak-banyak,
siap jo alat sanjatonyo.

Pado hari nan kalimo,
batambah payah angkatan rajo nantun,
alah hampia kan kalah hanyo lai.

Tidak mananti lamo lai,
hampia kan kalah rajo nantun,
baa nan tekad musuah nantun,
rajo cilako kan inyo bunuah,
Puti Salendang kan ditawan,
minantunyo kan dibantai,
di gulai dimakan basamo-samo.



muntjulah scorang pahlawan berkuda

Kutiko saat-saat nan mancamehkan,
hampia kan kalah parang rajo,
surak urang bagai guruah,
raso kan sampai ka ateh langik,
lah tibo sajo surang pahlawan,
inyo datang maracak kudo,
kudo sambarani capek larinyo,
tak ubahnyo sarupo kilek,
mamagang sabilah padang ditangannya,
dihalaunyo musuah kucar kacir,
padangnyo malayang bak baliang-baliang,
sia kanai sia rabah,
surang tak talok malawannyo,
habih balarian musuah nan datang.

Alah sampai hari kaanam,
tiok kan kalah rajo nantun,
alah datang pahlawan gagah,
padangnyo sarupo baliang-baliang,
kancang nan bukan alang-alang,
surang tidak ado nan barani,
musuah balarian puntang pantiang.


Alah sampai tigo hari,
satiok lamah pasukan rajo,
lah datang pahlawan ateh kudo,
antah dari mano datangnyo,
antah tajun dari langik,
antah mambasuk dari bumi,
surang tidak nan tahu.

Alah sampai kaba barito nantun,

kapado rajo dan mantari-mantari,
tapi surang tidak nən tahu,
dari mano datangnya pahlawan bakudo,
hənayo satu nən jaleh,
inyo bañihak kapado rajo,
handəm karam musuah dibuweknyo.
tantang barito nan ganjia nantun,
lah sampai pulo katalingo tuan puti,
namun sarupo jo nan lain,
kok barupo takok taki,
surang tidak dapek manjawabnyo.

Anak urang Lubuk Nalako,
pai marantau ka tanah Jawo;
Kaba baraliah sakutiko,
sungguah baraliah disitu juo.

.//.



jang paling bahagia ialah tuan puteri Selendang Dunia djuga

8. R U S I O T A B U K A K .

*

Kito curitokan Puti Salendang Dunia,
 sajak manjatuahkan bungo hikmat,
 sampai mandapek judu suami,
 bukanlah anak rajo-rajo,
 tapi saikua hewan sarupo kambiang,
 lah rela pulo hati didalam,
 itu adolah kuaso Tuhan,
 tantu ado hikmah didalamnya,
 apo rusio didalamnya,
 Tuhan sajo nan ka tahu.

Tidua baduo dalam kulambu,
 badup jo biri-biri,
 tapi si Domba tidaklah amuah,
 inyo lalok dibawah sajo,
 disadiokan tampek sabuwah,
 dialeh jo kain-kain,
 disitulab biri-biri lalok,
 ibo jo lucu kito mamikiakan.

Kok hari alah siang,
 bolau bamain dalam taman bungo,
 bamain surang diri sajo,
 makan daun-daun jo rumpuik mudo,
 maalunlah nan banamo kambiang,

hanyo mamakan daun-daun,
makan nasi tidak pandai,
apo lai makan gulai ayam,
itu pantangan kambiang bana.

Damikianlah nan alah tajadi,
sampai tajadi paparangan,
kutiko tadanga kaba baritonyo,
ado muncul saurang pahlawan,
pahlawan bakudo sangaik gagah,
lah tibo firasat dek Salendang.

Satiok hari alah siang,
dipareso puti dalam taman,
biri-biri nan tidak kalihabab,
antah kamano garan painyo.

Bak itulah padohari nan katigo,
Si Domba alah bamain kadalam taman,
puti Salendang didalam biliak,
baru sajo si Domba turun kahalaman,
inyo maintai elok-elok,
di tinjau dari jauah sajo,
manyuruak Puti dibaliak bungo,
diliheknyo sagalo korenah lakinyo,
lah pai si Domba kabaliak bungo,
iyo sabatang bungo kamuniang,
ado sabanta antaronyo,
lah tampak surang anak mudo,
gagah nan bukan alang-alang,
abajalan ba lambek-lambek,

alah sabanta antaronyo,
tampaklah kudo saikua,
kudo sambarani sangaik gagah,
bapalano ameh sacukuiknyo,
alah diracaknyo kudo nantun,
dalam sabanta antaronyo,
leh tabang kudo nantun,
mambawo panunggang nan sangaik gagah tu,
heranlah puti mamandangi.

Lalu bajalan puti lambek-lambek,
dipareso kasado rumpuan bungo,
lah sampai dibungo kamuniang nantun,
bungo kamuniang nan rampak daun,
batemulah sahalai kulik biri-biri
galak tasengeng Puti Salendang,
rusio kini alah tabukak,
lalu diambil malah kulik,
lalu dibawo ka ateh ustano,
langsuang dibawo kadalam dapua,
api sadang dalam tungku,
tukang masak sadang mamasak,
lalu dimasuakkan kulik nantun,
ijo kadalam tungku barapi,
lah hanguih kulik biri-biri nantun,
asok mandulang ka udaro,
alangkah heran kito malibek,
sagalo nan kanai asok,
bagai basapuah dangan ameh.

Lah sudah kulik dipamggang,
pailah puti ka ayahnyo,

disampaikanlah kaba jo barito,
tantang apo nan diliheknyo,
heranlah rajo mandangakan,
sambia mangucap ba ulang-ulang,
iko malah rusionyo, minantu rajo,
hati harok bacampua cameh.

Anak puti babaju suto,
suto babungo bakarang-karang;
Dialiah pulo jalan curito,
baraliah padurang parang.

Pado hari nan sahari itu,
musuah tak tahan malawan lai,
tasasak kasado paparangan,
dinaiakkalan bandera putiah,
tandonyo kalah tidak basyarat,
pahlawan lah pulang ka kandangnyo.

Satantang pahlawan nan bakudo,
alah babaliak kataman bungo,
kudo sambarani lah hilang gaib,
alah mancari kian kumari,
mancari barang nan tasuruak,
namun lah payah dek mancari,
nan dicari tak kunjuang dapek.

Sadang mancari-cari juo,
lah mancogok rajo jo anaknyo,
iyo Puti Salendang Dunia,
lalu bakato maso itu:

" Manolah rang mudo janyo hambo,
rang mudo usah manyuruak juo,
maohkanlah lancang anak kami,
kok kulik alah dibakanyo,
tidak dapek babaliak lai,
rusio alah tabukak kasadonyo...."

Lah sato pulo Salendang Dunia:
" Oo, kakanda suami hambo,
pandai bana kanda manyuruak,
kini tak dapek babaliak lai,
karupo asa biri-biri,
kulik lah sudah hambo panggang,
tidak babaliak kaasa lai,
kok lah salah hambo disanan,
barilah hambo hukumannyo....!"

Sabuwah tidak dapek jawab,
satu tidak dapek kecek,
alah basimpua rang mudo tu,
dimuko rajo ayah Salendang,
lah bapaguik-paguik katigonyo,
dibawo naiak malah sakali.

Masuak ka ustano katigonyo,
tibo parentah dari rajo,
bahaso minantunyo alah datang,
alah babaliak kasa mulonyo,
iyolah surang pamuda tampan,
lah tibo pulo barito parang,
lah usai parang maso itu,

musuah alah kalah parang,
alah manaiakkan bandera putiah,
basanang hati rakyat kasadonyo.

Di ulamg baralek sakali lai,
alek salamo tujuah hari,
dijamu rakyat kasadonyo,
dibantai kabau bapuluah ikua,
ba cepak cepong kasadonyo,
basanang hati urang sanagari.

Alah baralek salamo duo hari,
bakato si Domba ka bininyo:
" Adiak denai Salendang Dunia,
nak cukuik kagambiraan kito,
saeloknyo kito japuik mandeh jo bapak,
bapak jo mandeh dalam dusun,
urang patani buruak rupo,"

Lalu manjawab Salendang Dunia:
" Kok bak itu kato tuan,
laimoh tuan ba bapak ba mandeh,
kito japuik baliau kini,
nak samo sanang paratian,
nak tahu pulo hambo jo mintuo,
sugiro malah kito bakameh.

Ramilah urang dalam koto,
banyak urang manjuwa ameh;
Baralish pulo jalan curito,
aliahnyo kapado mandeh Domba Ameh.
//.

9. P A N U T U I K

*

Alah tibo masu kutikonyo,
barangkeklah puti jo suaminyo,
mukasuik manjapuik mintuonyo,
cukuik panginang jo pangsuah,
sarato pagawai saparalunyo,
lah naiak ka ateh kureta ameh,
ba rampek kudo nan ma helonyo.

Sabab bakato Si Domba Ameh:

" Manolah adiak kato hambo,
usah adiak malu jo sagan,
bapak jo mandeh urang kampuang,
iyo urang kampuang buruak sajo,
di am dalam gubaak buruak,
kok kan malu rasonyo adiak,
molah kito babaliak pulang."

Manjawab Salendang jo tasengeng:

" Itu tak usah tuan risaukan,
buruak jo rancak mintuo hambo,
kan hambo junjuang tinggi-tinggi,

Alah taruih bajalan kureta nantun,
urang basusun tapi labuah,
malibek puti jo suaminyo,
bagadang hati kasadonyo,
mangucap syukur kapado Tuhan,

Alah barapo lamonyo,
sampailah arakan ka tapi kampuang,
kampuang si Domba dahulunyo,
disuruah baranti kureta nantun,
alah bakato Domba Ameh:
" Manolah adiak kato hambo,
itu moh gubaak mandeh hambo,
tidakkoh malu adiak singgah,
awak biaso dalam maligai,
kan naiak ka ateh gubaak buruak?"

Lah basadio Puti turun kureta,
dipacikkan tangannya dek si Domba:
" Iko rumah mandeh nan lamo,
kini baliau alah pindah,
taruihkanlah jalan kureta iko."

Alah bajalan pulø kureta nantun,
alah sampai ditapi rimbo,
tabantang jalan isangaik rancak,
rumah kasadonyo baru-baru,
bakilatan atok kanai mato ari,
nan sabuwah nan paling rancak,
lah silau mato mamandangi.

Masuaklah kureta kahalaman,
halaman batabua intan jo podi,
heran tacangan Salendang Dunia,
dal am ustano rajo dimano juo,
tidak ado nan sarupo itu,
rumahnya tabuwek ameh padu,

Satantang mandeh sarato bapak,
mandanga ado arakan datang,
alah kaluwa dari rumah,
tagak baduo tacangang-cangang,
siapokoh garan nan datang,
rajo dimano, puti dimano,
naiak kureta sarancak tu,
apo mukasuik kadatangannya?

Alah turun si Domba Ameh,
turun baduo jo bininyo,
lah sampai dimuko kaduonyo,
duduak basimpuaah kaduonyo,
sabagai manyambah rajo basa,
heranlah baliau mamandangi.

" Usah hambo salah tanyo,
jaan hambo salah siasek,
siakoh garan urang mudo,
manga basimpuaah dimuko kami?"
tanyo bapak jo mandeh.

Manjawab si Domba Ameh:

" Usah mandeh salah sangko,
hambo iyolah anak mandeh,
anak mandeh si Domba Ameh,
hambo barubah jadi manusia,
nan iko iyolah minantu mandeh,
puti rajo dalam nagari,
kok nak tahu curitonyo,
isuak buliah hambo sabuik,



Sesamp; i diinuka orang tuanja bersumpahlah

sabab panjang curitonyo."

Sungaiklag^v gadang hati mandeh,
anak lah jadi urang bana,
tidak sarupo kambiang lai,
lah mandapek pulo bini rancak,
puti rajo dalam nagari.

Alah sudah babincang-bincang,
didalam rumah ameh nantun,
dibawolah mandeh jo bapak,
dibawo manghadap rajo dinagari,
nak samo sanang kasadonyo.

Manuruuk kaba curitonyo,
sasudah mangkat mintuonyo,
Si Domba diangkek manjadi rajo,
manggantikan mintuonyo, *nan lah hilang*.
parentehnyo adia bukan kapalang,
rakyat sadonyo basanang hati,
aman santoso salamonyo.

Tidak elok ~~kita~~ badandam kasumat,
jauahkan bana cakak kalahi;
Sampai disiko curito tamat,
elok kaba kito sudahi.

T A M A T

=====

LURAH BUKIT, 8 MEI 1989.

pukul 18.00 WIB.

.////.